



# Tir Yimyim

www.tiryimyim.in

Regd. No. RNI. NAGAAO/2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tiryimyim@aolima

tir yimyim

TAPAK 7

**Milen kati aika tsükloksüba ama tangar den tepela lemsatepang: Droupadi**

**Macron-i Israel dang civilian tem metepsettsü mepeshi**

VOL. XXI NO. 35 (ADOK 35) DIMAPUR

AMUNGNÜ (SUNDAY)

YIMPOKSÜI (NOVEMBER) 12, 2023

₹ 5.00

## NU-i NCC cadets dang taochi sayur

**Mokokchung, November 11, 2023 (Agencies):** New Delhi nung Pre Republic Day aser Republic Day 2024 camps nung adentsü atema shimba kaketshirtem semester exams magütsüda daksütsü ta Nagaland University-i metetdaksüogo.

November-December 2023 nung undergraduate semester exams agitsü saka NCC kaketshirtem mezüludaksütsü. Parnok asoshi yaser special examination ka agitsü aser aji masüda taruba semester atema provisional admission agidaksütsü ta NU-isa ashi.

Mapang talangka NCC-i mepishia aruba agizükba atema kanga pelar ta 25 Naga Battalion NCC nung Commanding Officer Col CST Swamy-i ashi.

Paisa NU Vice Chancellor Prof JK Patnaik dang parnoki mepishiba agizükba aser NCC cadets-i parnok inyaksangshi nung tajungba akümsü maongka agütsüba atema pelaba shisem.

Delhi Cantonment nung Republic Day Camp and Parade ya NCC training sentong tongtipangtem lir saka iba mapang Nagaland nung NU semester exams agiba ajanga NCC cadets-i tetsükdaksü ajurua aruogo.

Republic Day Camp ajanga 'Youth Exchange Programme' atema lenmang lapoktsür aser iba ajanga NCC cadets-i USA, UK, Argentina, Brazil, Russia, Nepal, Vietnam, Maldives, Mauritius, Seychelles aser New Zealand linüktem nungi cadets den ajurutepa shilem agiteter.

## AKMWP-i Box-cutting area adopt asür

**Kohima, November 11, 2023 (TYO):** Association of Kohima Municipal Wards and Panchayats (AKMWP) ajanga Honibarnü Box-cutting, Kohima tobur ajungtsü aser merüktetba mapa inyakogo.

Kohima nung box cutting area ya kanga dang tongtipang aser jungjunga ayutsüla kechiyong ammag nung iba tesem nung mapa tajung aser tamajung aika inyaker ta AKMWP president Thejao Sekhose-i ashi.

Kohima jila nung kanga dang tongtipang tesem ka asünung AKMWP-i sorkar dang nungi iba tesem anepalutsü atema temelaba

meshia aruba DPDB Kohima ajanga agizükogo ta Thejao-i ashi.

AKMWP ket nung senotsü peria maliba ajanga sorkar dang tobur ajungba mapa inyakba den CCTVs enoktsü atema teyari meshitsü ta paisa ashi.

AKMWP nung lanur volunteers ajanga iba Box-cutting tesem mita anütsü aser police department dang security atema police lemzüksütsü atema asündangtsü ta Thejao-isa shisem.

AKMWP-i iba tesem nung Power Department teyari agia lighting enoktsü aser tarutsü nung ornamental tree plantation asütsü ta paisa ashi.

## Kohima jila nung lenmangtem reprangdang



**Kohima, November 11, 2023 (DIPR):** November 11, 2023 nü Kohima nung National Highway roads aser urban roads reprangdanga senzüogo.

DC Kohima, SP, RO, EE NPWD NH, EE NPWD R & B, EE Urban, EE KSDCL, NHIDCL aser Contractors ajak senteper lenmangtem reprangdanga senzü.

Parnoki Kohima-Dimapur 4 lane package 3, Kohima - Bypass, Kohima - Mao aser Kohima town lenmangtem repranga senzü aser idangji lenmang nung ongkentem, süsümedem malibatem ajitet aser iba osangji NHIDCL o NPWD

nem sangoktsüogo.

Kohima DC-i NHIDCL aser NPWD dang Kiruphema nungi Khuzama tashi lenmang ajak jungjunga anepalutsü metetdaksü.

DC-isa Peducha Dzudza nung aser Kohima-Mao road nung apu kar mejungi aliba indang nenshia ashi.

Ketdangsurtemisa Kohima bypass tunnel construction aser NH 39 (Old) den NH 61 (Old) sendaktepba T. Khel model village road semdang.

Hornbill festival mapang traffic khuret ajema akümsü atema SP Kohima-ia lenmang kar bushitepa liasü.

## Nagaland nung National Education Day mongogo



**Kohima, November 10, 2023 (TYO):** Honibarnü Nagaland Education Association (NEA) ajanga National Education Day ayonga mongogo.

Iba sentong ya Directorate of School Education (DoSE) nung "Innovative learning for sustainable future" omen nung ajemdaker agi.

NED ya kümshia November 11 anogo amonger. India nung mezüngbuba Education Minister Maulana Abul Kalam Azad asoba anogomung nung NED amonger.

"NED ya benjung anogo ka dang masü saka education indang department balala nung inyakerkem ayongzükba anogo ka lir" ta School Education Principal Director Thavaseelan K-i ashi.

NED 2023 indang omen ya kanga jung yangluogo aser iba ajanga learning/education nung inyaksangshi tasen agizüktsü ajungmesor. Tanü alima kanga kara ainba putu ka nung akhidang nungi benshia aruba inyakyim yagi meperir aser melenshitsüla,

ta pai ashi. Shisaliok rejutem nung asenoki innovative learning tenzüksüla aser yimya balala ajanga tesayuba agütsütsüla ta Thavaseelan-isa ashi.

"Tashitait tekolok ka ajanga tashitait linük ka yangertetsü aser tekolokji system of education ajanga yanglur. SCERT, NBSE, Higher education, University, school education amala nung inyaker ajaki lanuputu tekolok anitetsüla kechiyong parnokji asen tarutsü linük lennirtem aser yanglurtem lir" ta paisa ayongzük.

Principal Director-isa state nung shisashirtem aser education department balala nung inyakba ketdangsurtemi International Education Day omen mapa kuma inyaksü ayongzük.

Taküm International Day of Education indang omenji "to invest in people, prioritize Education" lir.

Iba sentong nung shisalen sayurji Professor Department of Education, Nagaland University

Prof Lungsang Zeliang liasü.

"Asenok tanü khuret agi sünger aliba putu ka nung alir. Tarutsü atema shisabulu aika lir. Tsüngsang-mopung melenshiba aser meimchir nütsüng yongsük teimba akümba aser ali rongsen agiteta agiba, alima rongsenketzüng merenlokba aser safety & security tebilemstütem lir" ta lai ashi.

Asenoki lanurtem nem shisatsü agütsütsüla aser tarutsü atema parnok renemtsütsüla. Asen education system yanglushitsüla aser tarutsü tayongzükbatem atema tesayuba agütsütsüla, ta Prof Lungsang-isa ashi.

National Education Policy (NEP) 2020 nung education jenjang balala nung angazükbayim tajung aika dena lir aser iba ya India rongsenketzüng jenjang ajungkettsü tangatetba nung lir, ta laisa ashi.

"Asenoki education system tajungba yanglushitsüla aser ibaji asü nung dang tarutsü tia tajungba yanglutsü" ta laisa shisem.

## Nagaland sorkari ENPO nem special economic package agütsütsü shidang

**Dimapur, November 11, 2023 (Agencies):** Eastern Nagaland Peoples' Organisation (ENPO)-i state balaka meshiba takhangba angatetteptsü atema Centre-i economic package ka agütsü junger ta Nagaland sorkari shiogo.

"ENPO indang tebilemstü ya yimtenren indang masü saka rongsenketzüng indang lir kechiyong parnok infrastructure, education, health tsütsü tangar memenep aser ano tangar dang nungi per capita income tajemba lir" ta Minister K G Kenye-i ashi.

"Item tebilemstütem atema inyakra tanga khuret kecha malitsü. Asenoki ENPO tesemtem nung khuret ajak nung temulung agüja inyaksüla" ta Kenye-isa ashi.

Eastern Nagaland nung district 6- Mon, Tuensang, Kiphire, Longleng, Noklak aser

Shamator lir. Item district nung Chang, Khiamniungan, Konyak, Phom, Sangtam, Tikhir aser Yimkhiung kintem alir. ENPO-i Eastern Nagaland ta ser state balaka meshir

Centre-i Nagaland nem senotsü aika agüjaka state sorkari ENPO tebilemstütem atema meinyaksür ta jembiba atema Kenye-i "senotsü agütsüba inyakyim meshitak mesüra kechi nükjidong atema yok ibaji matong asütsü akok" ta ashi.

Ajisüaka tesüiba nung meinyaktetba mapatem asoshi state sorkari Centre dang ENPO area atema economic package agütsütsü shidangogo. Yamaji asü nung dang parnoki Nagaland nung tanüngba tesemtem meneptsü, ta Minister Kenye-isa ashi.

"State sorkari medeni Ministry of Home Affairs (MHA)

aser ENPO tsüngda mapang talangka olemtep liyonga arur. Tetenzük nungi state sorkar dendaksü asübo mapang talangka magila. State sorkari olemtep nung adenbaji meinprong mesüra tetsükdaksü ka ama mebilemstüla" ta pai metetdaksü.

State sorkar tang ang olemtep nung adener aser parnok o parnok tsüngda tangatettep kati aruba nung onoki anema menokdaksü. Onoki ENPO aser Centre tsüngda teyariteper ka ama shilem agir aser parnok dang kechi takoktsü iba amaji angatetteptsü ayongzükter, ta Kenye-isa ashi.

ENPO-i state sorkar dang nungi teyari meshiba atema pelar. 2011 küm state sorkari ENPO ken o benokba sülen mangatettep kecha mali, ta paisa shisem.



(Abelen) Dimapur Watsü Telongjem lokti senden nung Changtongyatsürtemi temeja ken atenba noksa nung angur. (Dimapur, Nov.11,2023) (Achiji) Dimapur Watsü Telongjem lokti senden nung Longjanglartemi tetsü tebou kensü nung ken tena shilem agiba noksa nung angur. ( Dimapur, Nov.11, 2023).

### NBHM-i kaketshirtem atema painting tetoktepba ayongzüka agi



**Dimapur, Yimpoksüi/ November 11 (TYO):** December 5 nü 5buba Nagaland Honey Bee Day 2023 mamung tsüngda Nagaland Bee Keeping & Honey Mission (NBHM)-i ayongzüka Dimapur aser Chümoukedima nung aliba school kaketshirtem atema painting tetokteba ka ayongzüka agiogo.

Iba tetoktepba ya 6th Mile, Sovima village, Chümoukedima nung November 10 nü NBHM multi utility centre nung agia liasü.

Iba sentong ya bee-keeping ya koda tongtibang aser ninang mojitzü agütsüba ninang ajanga lokti nung kechi shilem agir iba indang tangazükba agütsütsü nükjidong nung ayongzüka agiogo.

Ajak senteper school 12 nungi kaketshir 24-i iba tetoktepba nung shilem agi aser parnok atema sempet aser kuli kaketem renemja agüja liasü.

Sentong nung o jembiba mapang NBHM Deputy Team

Leader, Khuvozoyi Vese-i ashiba agi, insect tem rongnung ninang yagi dang meimchirtem liyonga aotsü atema service tajungtiba agütsür. "Naro apongba süngtongtem shilem 80 parnok pollination atema mojitzü agütsüba ninang dak metaloker lir aser item süngtonglitongtem nung adokdaksüba süngjangtem ya meimchirtemi achir," ta pai ashi.

Vese-isa, Nagaland nunga aluyimertem atema ninang metsüba ya sen aazüksü asoshi lenmang tajungtiba ka kümogo. "Nagaland amala state tila ka dang süaka asenokia küm nung 440 metric tonnes adokdaksüteter ta nema danga ashir," ta pai ashi.

Ibayongji mojitzü agütsüba ninangtemi environment nem dang masü saka aluyimertem nem senotsü aazükdaksüba atema tenüngsang agütsütsü kanga nüngdakba lemsatapa liasü. "Asenoki ninang kümzüka yudi aser meimdi aser ninang nem asenok yaridaksüdi," ta pai

ashi. Tetoktepba nung takok angurtem:

1st position, Moalemla Longkumer (Class 9); Hollotoli school

2nd position, Sudip Bisaws (Class 9); Don Bosco higher secondary school

3rd position, Linali Sumi (Class); Delhi Public school

Sentong tatem tetoktepba nung shilem agir ajak nem kuli kaketshir asem nem December 5 nü Nagaland Honey Bee day amungba mapang senpet agütsütsü.

Consolation angurtem rongnung, Tolla Imlong (Class 10); Maple Tree school, Aswaria Bahattacharjee (Class 9) Holy Cross higher secondary school aser Tinghoithing Hansing (Class 9) Delhi Public school nunger densema liasü.

Iba tetoktepba asoshi tetendangerji Wapang Ozükum aser Merimvo Doulo na liasü.

### Tour Guiding & Homestays dak sendakba nung Capacity building sentong ka agi

**Dimapur, Yimpoksüi/ November 11 (TYO):** Tour Guiding aser Homestays dak sendakba nung Capacity building sentong ka November 11 nü Step-by-Step School Auditorium, Zunheboto nung agiogo.

Iba sentong ya Tourism, Government of Nagaland aser Nagaland Tourism Association (NTA) na senteper ayongzüka agia liasü.

Mezüngbuba session nung Hokheto Yeptho, Evangelist, SBAK, Aizuto-i Tsüngrem temaotsü meshizüka sarasadem. Sentong ya NTA tir Vimeto Vakha lenisüba nung agi aser iba sülen peisasa metetpelaba

mapang agi aser Sr. Tourist Officer, Zunheboto Nyurhetho-i okila o jembia liasü.

Sentong nungsa Team Leader, Tizu Valley Biodiversity Conservation & Network, Zunheboto, Nagaland Ivan Zhimom-i, tzü-mopung wazüka ayuba, state nung aliba species tem wazüka ayuba aser aluyimba dak sendakba nung tajangshibatem indang lemsatapa liasü.

Mezüngbuba session ya Nagaland Association of Tour Operators (NATO) tir Kejaroko-i anküp o jembir tembanga liasü.

Süngo ajemba mapang tatsüka agiba sülen NATO tir

Kejaroko-i, Nagaland nung tourism dak sendakba nung lenmang sadema lapoka aliba indang jembi aser profession ka ama Tour Guiding dak sendakba nung state kübok district balala nung lenmang sadema lapoka alibatem indang osang tejangja agüja liasü.

Maneni chichiyongba mapang tatsüka agiba sülen tanabuba session tenzük, kong NTA tir Vimeto Vakha-i business ka ama Homestays indang onük nung ajemdaker jembi. Sentong nungsa shilem agirtem den sensaksema mapang ka agi aser iba sülen parnok nem kuli kaketshirtemi ashir.

### Angh La Ganesan-i Diwali benjung salem lemsatep

**Dimapur, Yimpoksüi/ November 11 (TYO):** Nagaland Angh La Ganesan-i sangdong ka ajanga Diwali benjung salem lemsatepogo.

Iba benjung ajanga tesangwa-i tamang koktetba, tajungi tamajung koktetba aser shisatsü agi tamashiba koktetba temaitsü sayur. Iba benjung ajanga nisung ajak mulung asüngteta kümdaksüba den aria

bilemba agi süngdaksür. Iba benjung ya tesawa, sempet agütsütepba aser janratema mungtepba kija masü saka asenok taküm lenidaksüba yimayimpongtem lepa reprangshiba mapang ka lir, ta pai ashi.

Iba benjung amungba ajanga, telungjem, tepela, anema aliba, yimjijung aser takok bener arudakjang, ta Angh-isa shisem.

### Keziah Mero-i Miss Kohima 2023 tetoktepba kokogo



**Kohima, Yimpoksüi/ November 11 (TYO):** Arishi küm 18 tain Keziah Mero-i Miss Kohima 2023 tetoktepba kokogo. Iba sentong ya 4front management-i ayongzüka De'Oriental Hotel, Kohima nung agia liasü.

Tetoktepba nungsa arishi küm 19 tain Tolika K Kishepu 1st runner up aser arishi küm 20 tain Katienla Longchar 2nd runner up liasü.

Miss Kohima Keziah Mero ya Phek district kübok Pfuteromi yimtsüng nungi lir aser la tang G. Rio School Kohima nung class 12 nung azünger. Laisa Miss Talent subtitle ngua liasü.

La nem sen 50,000 alang gift hampers den beauty within the salon nungi 20,000 makeover vouchers agüja liasü. Iba tetoktepba akokba sülen la Miss Nagaland 2023 tetoktepba nung shilem agitsü, koba December 8 nü State Cultural Hall Kohima nung agitsü.

First aser second runner-up nem sen 40,000 aser 30,000 alang gift hampers aser sen 15,000 aser 10,000 alang makeover vouchers agüja liasü.

Maneni tetoktepba nung Kevilenuo Semou-i Miss Photogenic subtitle aser Tolika K Kishepu-i Best ramp walk subtitle ngua liasü. Subtitle angurtem nem sen 5000 alang gift hampers agüja liasü.

Iba tetoktepba ayongertemi colleges, sazolie college, Kohima arts College, St. Joseph college autonomous, model Christian College aser Kohima atema TS academy of design Kohima nung open audition agia liasü, ta management co-founder Theja Sekhose-i ashi.

Tetoktepba nung tetendangerterem rongnung Dr. Amos Sekhose (Agathos society), Pelevinuo rüpreo (former Miss kohima 2017) aser Lipokzulu (General Secretary of Miss Nagaland, BASN) nunger densema liasü.

### ANTA annual day Nov 18 nü amungtsü

**Kohima, Yimpoksüi/ November 11 (TYO):** ANTA Hq. Kohima-i sangdong ka ajanga ANTA district units ajak dang ANTA Raising Day cum Annual Picnic November 18 nü amungtsü metetdaksüogo.

Association-isa, iba anogo, züngsem mesüra gari kar danga

taxi ama senzusenpongba metetra aser temzüng ozüng sülen manidakra temerenshi agütsütsü ta metetdaksüogo.

ANTA Hq Kohima tir Dziesevituo Solo-isa, nüburtem dang iba anogo aremzüka inyaksangshitsü asoshi mepeshia metetdaksüogo.

# Madhya Pradesh assembly election atema BJP-i manifesto saya



November 11, 2023 nü Bhopal nung BJP National Tir, JP Nadda aser Madhya Pradesh Chief Minister Shivraj Singh Chouhan na den party lenirtemi state assembly election atema manifesto sayadang tangokba noksa nung angur.

**Bhopal, Yimpoksüi/ November 11 (Agencies):** Bharatiya Janata Party-i taruba Madhya Pradesh assembly election atema party manifesto sayaogo; manifesto nungji BJP-i sensaker kibongtem nungi tetsürtem nem post graduation tashi angati shisaliok agütsüsü nangzuka lir.

Honibarnü Bhopal nung BJP Tir, JP Nadda den Madhya Pradesh BJP Tir, VD Sharma aser Chief Minister Shivraj Singh nunger den lenirtemi party manifesto saya.

Manifesto nung 'Ladli Bahna' aser PM Ujjwala' schemes nungi tajangzük angurtem nem gas cylinder ka nung sen 450 agi dang agütsüsü nangzuka lir.

BJP-isa aluyimertem dang wheat quintal ka (seret 100) nung sen 2,700 agi alizüksü aser tsük quintal ka nung sen 3,100

agi alizüksü nangzuka lir. BJP-isa 'Ladli Bahna' programme kübok ki malirtem nem ki sütsüsü aser kibong shia nung züngsem ka nembosa mapa agütsüsü mesüra peisasa mapa kabosa inyaktetsüsa maangka agütsüsü, ta nangzuka lir.

Manifesto nungsa, BJP-i maneni Madhya Pradesh nung nung takok ngua sorkar kümra state nung IITs (Indian Institutes of Technology) den kasa technological institutes aika amenoktsüsü aser AIIMS (All India Institute of Medical Sciences) ama medical institutes aika amenoktsüsü, ta nangzükogo.

BJP-i, state nung expressways tasen trok yanglutsüsü aser tribal nüburtem nem tashi agütsüsü atema sen 3 lakh crore lemsüksüsü, ta nangzük.

Manifesto sayaba sentong nung jembidang BJP Tir, JP Nadda-i, atangji manifesto nung nangzükba ama inyakba party ji BJP dang lir, ta ashi.

Paisa, BJP-ibo monitoring system ajanga manifesto nung nangzükbatem mapa kuma inyakba ketdangsia repranger, ta metetdaksü.

State BJP Tir, VD Sharma-i, committee-i loktiliba nung aika den asüngdangatepa jembiba sülen manifesto ya renemogo, anungji iba manifesto nung nüburtem taginüba onüktem lir, ta ashi.

Chief minister, Chouhan-i, BJP-i kechiba 'Narak Chaturdashi' benjung mapang nung manifesto sayar, ta Congress-i süngmanger, kechiyong Congress-i puti-otsü memetet; iba anogo ya Krishna-i aianutem Narakasur nungi kümzükba anogo lir, ta ashi.

# Uttarakhand state assembly nung Uniform Civil Code draft benoktsü

**New Delhi, Yimpoksüi/ November 11 (Agencies):** Kobi melii Uttarakhand state sorkari state assembly temeja ka ayongzuka Uniform Civil Code (UCC) indang draft benoktsü, ta osang ka ajanga metetdaksü.

UCC draft nungji tebur kati kinüngtsü ka dak tali agiba mesüra tetsür kati kinüngbu ka dak tali ayuba nokdangtsü atema ozüngtem benoka lir. Kasa draft nung kibong mekümaka apuani na ama ki ka nung külemi alirtem nem temelaba agüja register asütsü benoka lir.

Taküm küm tetenzüklen Uttarakhand Chief Minister, Pushkar Singh Dhama-i UCC draft renemtsü atema committee ka tentetba sülen committee jagi nisung lakh 2 dak tema den pei tebielmeba asüngdanga lemsatepa aruogo.

UCC nükjidong ya India nung tamangba yimsü balala amangertem senso ajak atema

kasa ozüng aika benoktsü nükjidong nung lir. UCC kübok kiyimba, balalulaba aser senmangba dak sendakba ozüngtem kasa dang benoktsü.

Osang angazükba agi, Uttarakhand indang UCC draft nungjisa jala-jabaso kecha mebandangi ajak nem senmang kasa lemsüksüsü atema benoka lir.

Taoba assembly election nung BJP-i Uttarakhand nung UCC benoktsü atema nangzuka liasü. Iba election nungji takok anguba sülen Chief Minister Dhama-i retired Supreme Court Judge Ranjana Prakash Desai leniba nung committee ka tenteta UCC draft renemtsü tuyua liasü.

Iba committee kümsük taküm December ita tashi atsülangtsüogo. Parnoki organization, institutions aser tribal telok balala nungi nisung lakh 2 dak tema ajurua tebilemba asüngdanga aruba sülen draft renemogo.

# Milen kati aika tsükloktsüba ama tangar den tepela lemsatepang: Droupadi



Droupadi Murmu

**New Delhi, Yimpoksüi/ November 11 (Agencies):** Diwali benjung atongtsü anogo ka dang lia Honibarnü linük Tir, Droupadi Murmu-i sensotem den Diwali salem lemsatepba den külemi ajak dang sensakertem aser nungdabapurtem den tepela lemsatepang, ta ayongzük.

"Deepawali ya tepela benjung ka lir. Iba benjung ya tesangwa agi tammang madak aser tajung agi temenen madak takok anguba benjung ka lir. Tamangba yimsü balala amangertemi iba benjung amonger aser temeim, adianu temeimtep aser tesünep osang sangdonger. Iba benjung ya taochi sayuba aser azükaru temaitsü lir," ta lai metetdaksü.

Deepawali benjungmong ajangasa meimchirtem ajungtsü atema inyaksü asoshi asenok ajungmesor, ta Tirisa metetdaksü.

"Milen kati tanga milen aika tsükloktdaksüteter. Iba denji kasa asenoki sensaker aser nungdabapurtem den asen tepela lemsatepa parnok taküm nung tepela aser azükaru bener arutsütetsü," ta Murmu-i metetdaksü.

Laisa ajak dang yiruyipong masütsüsa tesangwa benjung ya amongtsü aser tzi-mopung wazükba ajanga linük yangerba nung shilem agitsü ayongzük.

"Deepawali benjung nung ni India nung aser bendanglen alir asen senso ajak den tepela salem lemsateper," ta laisa lemsatep.

<b>बैंक ऑफ बड़ोदा Bank of Baroda</b>		<b>KOHIMA BRANCH</b> Main Bazar Road, Near Old Taxi Stand, Kohima- 797001 Email: Kohima@bankofbaroda.co.in		<b>Kiojen ayoktsü atema Sale Notice</b> APPENDIX- IV-A [See proviso to Rule 6 (2) & 8 (6)]			
Securitisation and Reconstruction of Financial Assets and Enforcement of Security Interest Act, 2002 aser Rule 6 (2) 8(6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice.							
Public aser talisa sen apur (tem), Mortgagor (tem) aser Guarantor (tem) nem iba sangdong agütsür, Secured Creditor dang mortgage/charge asüba tsünglanglen shia aliba kiojen State Bank of India nung Authorized Officer-i agiadokogo, aser iba kiojenji "Kong koma ali", "Koma lidir yamaji" aser "Yangji aliba ajak" tsünglanglen shia aliba account/s nungi sentsüh alangzüksü atema ayoktsü. Sen apur(tem)/Mortgagor (tem)/Guarantor(tem)/alangzuka aliba kiojentem/sentsüh/Reserve Price/e-Auction anogo aser mapang, EMD aser Bid Increase Amount tsünglanglen metetdaksür-							
Sl/ Lot No.	Name & address of Borrower/s / Guarantor/ Mortgagors	Short description of the immovable property	Total Dues	Date of E-Auction, Time of E-Auction, Start Time to End Time	1. Reserve Price 2. Earnest Money Deposit (EMD) 3. Bid Increase Amount	Status of Possession (Constructive/ Physical)	Property Inspection Date & Time
1.	Mr. Hyungwalo Jeshing Rengma, R/O- H. No. E/A-1/01, Agri Colony, Opp. Stella Higher Secondary School, Kohima, 797001, Mr. Kewetso Mero (Guarantor) New Minister Hill, Kohima- 797001.	Land and building measuring 1500 Sq.ft covered by Patta No. 8364 (New), Plot No. 5531 situated at Agri Colony, Kohima, District Kohima, Nagaland standing in the name of Mr. Hyungwalo Jeshing Rengma. <b>Bounded</b> : On the North by: Property of Seyiekhoh Angami, On the South by: Property of Hyungwalo Jeshing, On the East by: Nullah, On the West by: Property of Seyiekhoh Angami.	Rs. 1,98,87,471.60/- (Rupees One Crore Ninety Eight Lakhs Eighty Seven Thousand Four Hundred Seventy One and Sixty Paise) and interest and other charges thereon w.e.f 30.07.2022.	Date: 29.11.2023, Start Time: 01.00 pm End Time: 03.00 pm	1. Reserve Price: Rs. 4,30,00,000.00 2. Earnest Money Deposit: Rs. 43,00,000.00 3. Bid Increase Amount: Rs. 10,000/-	Physical Possession	24.11.2023 at 1.30 P.M.
Iba kiojen ayoktsü telatetbatem tejangja metetpelatsü atema yimibilema website link <a href="https://www.bankofbaroda.in/e-auction.htm">https://www.bankofbaroda.in/e-auction.htm</a> and <a href="https://ibapi.in">https://ibapi.in</a> nung reprangang. Iba dak alia bid asütsüpurtemi Authorised Officer den Mobile No: 81199 22922 ajanga tongteprateptsü akok.							
Date: 12.11.2023 Place: Kohima				Mr. K H Zhimo Authorised Officer Bank of Baroda			

<b>बैंक ऑफ बड़ोदा Bank of Baroda</b>		<b>CIRCULAR ROAD BRANCH</b> Ground Floor, Faith Building, Near Kharmahal Traffic Point, Dimapur, Nagaland- 797112, Email: vjdima@bankofbaroda.co.in		<b>Kiojen ayoktsü atema Sale Notice</b> APPENDIX- IV-A [See proviso to Rule 6 (2) & 8 (6)]			
Securitisation & Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 kübok Rule 6 (2) & 8 (6) nung ajemdaker E-Auction ajanga kiojen ayoktsü notice.							
Public aser talisa sen apur (tem) aser Guarantor (tem) dang, tsünglanglen shia aliba kiojen, koba Secured Creditor, Bank of Baroda, Circular Road Branch, Dimapur, Nagaland dang mortgage/charged süa liasü, ibaji Authorised Officer of Bank of Baroda, Circular Road Branch, Dimapur, Nagaland, Secured Creditor-i agiadokogo aser tsünglanglen shia aliba senotsü alangzüksü atema iba kiojenji "Kong koma ali", "Koma lidir yamaji" ayoktsü. Sen apur(tem) / Guarantor(tem) / Secured Asset(tem) / sentsüh / Reserve Price / e-Auction anogo aser mapang, EMD aser Bid Increase asüba senji tsünglanglen shia lir:-							
<b>Status of Possession:</b> Physical <b>Property Inspection anogo aser mapang:</b> 24.11.2023 & 10:30 AM nungi 4:00 PM <b>Sentsüh ajak agi:</b> 29.12.2021 anogo tashi nung Rs.1,11,10,006.32 (Rupees One Crore Eleven Lakhs Ten Thousand Six and Paise Thirty Two Only), iba dak alia sen tetemlok aser tanga charges adentsü.							
Sl. No.	Name & address of Borrower/s / Guarantor	Detailed description of the immovable property with known encumbrances	Date & Time of E-Auction	Reserve Price, EMD amount, Bid Increase Amount.			
1.	1. MR. CHINNY MAGH (BORROWER) House No.208, Industrial Village, Razhuphe, Dimapur, Nagaland State- 797112. 2. MRS. NAOMI MAGH (CO-BORROWER) House No.208, Industrial Village, Razhuphe, Dimapur, Nagaland State- 797112. 3. MR. SENILO MAGH (GUARANTOR) S/o Chinny Magh, H/No. 208, Industrial Village, Dimapur- 797112, Nagaland.	A land measuring 0B-1K-18L and building thereon situated at Padumpukhuri, Dimapur covered by Patta No.1202, Dag No.295/1671 standing in the name of Shri Chinny Magh, S/o Late Ashiwa Magh. <b>Bounded by:-</b> North: Plot of Lanu Ao, South: Approach Road, East: Plot of N. Konyak, West: Plot of Bohovi Awomi.	29.11.2023 1:00 pm to 3:00 pm	Rs. 42,75,000.00 Rs. 4,27,500.00 Rs. 50,000.00			
Telatetbatem aser osang tejangja agüja aliba link nung angutsü <a href="https://www.bankofbaroda.in/e-auction.htm">https://www.bankofbaroda.in/e-auction.htm</a> and <a href="https://ibapi.in">https://ibapi.in</a>							
Date: 12.11.2023 Place: Dimapur				Authorised Officer Bank of Baroda, Circular Road Branch			



## TIR YIMYIM YIMOBILEM (EDITORIAL)

DIMAPUR AMUNGNÜ, YIMPOKSÜI (YIMPOKSÜI) 12, 2023

### Tsüngrem akhümtsübudi

**T**süngrem yimli nung ochi o kaji Tsüngremi Pai yangluba nisung nem Pa akhümtsübudaktsüner, anungji Pa akhümtsüburtem dangang Tsüngremia akhümtsübur. Atangji, asen Tsüngremji taochi Tsüngrem lir. Ajisüaka, Pa taochi angutsübaji asenok mapa, jakla yimya aser mulungsentsü dak dang keta lir. Asenoki Tsüngrem tsüngdang kechi yimya benshir yamaji dang Pai asenok dang benshitsü. Küm 40 tashi Israel madak obendanger inyaksang Eli putiri Tsüngremi pa aser par kibong koma temeshi lidaktsüner, ibaji meteta liasü. Ajisüaka, Eli putir atema terata mapang tuluka aru, kechiyong par jabsotemi Tsüngrem akhüm metsübu, anungji parnok takümtemi Tsüngrem tsüngdang tesempatsüka liasü. Aji oda, Eli putir atema terata tulutibaji Pai Tsüngrem akhümtsübutsü asü mesüra pa chirtemjiang akhümtsübutsü ta asüba tasüngdangba ka pa mulungjangi aru. Tia majung, Eli putiri Tsüngrem tsütsü masü pa jabaso ana tsütsüang tejak ashi. Pai Tsüngrem dang nungibo par jabaso temeimba meim aser akhüm tetsüsuba tsübu. Eli-i par jabsotem dang Tsüngrem akümtsübutsü ajungshitsü melen parnok nem Tsüngrem mezüngmeshidaktsü. Yob-ibo anepdang shia yakta saaka par chirnurtem asoshi Tsüngrem nem tarongba tenla agüja sarasademtsü. Yob-i par jala jabsotemi tai menaba mangu aser mangashi saka parnok Tsüngrem anema tai menarka alinunga ta bilema, pai anepdang shia sarasademtsü. (Yob 1: 5). Aji oda, Eli putiria inyaktsü südi ta Tsüngremibo imlar südi. Eli putiri par jabsotemi temenen mapa inyakba aser tenladak Tsüngrem mezüngmeshiba mapatem inyakba meteta dang liasü. (1 Samuel 2:22) Saka, pai parnok menokdang aser pai parnok atema sarasadem mesütsü. (1 Samuel 3:13) . Ashiko, Eli putiri par jabaso atema Tsüngrem dang mepishi asübo aser pai par jabsotemi maksütsü mapa tamajung inyakbaji nokdang asübo, Tsüngremia aochila. Ajisüaka, Eli putiri tanemi dang par jabsotem dang mapa tamajung mienyaksü o kar shirbo odang toktsü. Eli atema par jabaso anati Tsüngremi maginütsüsa inyakba mapatemji nokdangtsü koka liasü, saka pai menokdang. Tanü asenok tsüraburtem aika Eli putir amaji lir. Asenoki ngua asenok jala jabsotemi Tsüngrem mezüngmeshir saka asenoki menokdang. Atangji, Eli putiri pa jabaso ana dang ashi ama, yimya ka agibo temenen mapa meinyaktsü shia alitsüa akok, saka temenen mapa meinyaktsü menokdangra, o kijaiibo temenen tongpangji makoker. Iba jagi tsüraburtem aikati pei chirnurtem mazüokteter. Joko lia-lia Eli-ia dena Tsüngrem aküm tsübutsü melen, ashiko, pai par jabaso ana jagiang pa merenshitsü tsübu bilemer asütsü akok. Aji oda, Eli aser par jabsotemi Tsüngrem aküm metsübui aküm nungji, Tsüngremia parnok aküm metsübu. (1 Samuel 2:30) ) Par kibong menenyong Filistia nunger ket nung Israel nunger meyi semer dak tali tepsetdaktsü aser tezüngzüktepba süngdena dena bener odaktsü. Ibaji Eli putir aser par jabsotemi Tsüngrem metsübuba taa liasü. Asenok atema tekümdangtsüji ibaji lir. Asenokbo putir saka asen chirtemibo Tsüngrem mezüngmeshir, asenokbo temeshi saka asenok kibongbo memerük, asenok kidangbo temeshi saka asenok mapa inyakdakbo ochimashi mapa agi sünga lir. Asenoki tenla kidangbo Tsüngrem akhümtsübur saka kima tongerbo Pa mezüngmeshitsü tenzüker. Tsüngremi ibaji maginer. Asenok kong kechi inyaka lidir, mapa ajak nung Tsüngremi asenok nem Pa akhümtsübudaktsüner. Tsüngrem akhümtsübuba taküm aser kibongang Tsüngremia akhümtsübutsü aser Tsüngrem mezüngmeshiba taküm aser kibongbo Tsüngremia mezüngmeshitsü. Kibong kar nung danga tanurtemi Tsüngrem aküm metsübui lira, tsüraburtemi ibaji nokdangtsü Eli putir kibong ajanga asenok dang Tsüngremi ajungshir. Aji oda, asenoki Tsüngrem akhümtsübura, Paia asenok akhümtsübutsü.

## OLEMSABANG KIBUBA MEYONG KIDONG

~ Süpongnüsang Longkümer,  
Darogapathar Dimapur

Asen kin otsüla obuola nunger jongleyimti nung alitang kin rongnung kin kar mejitta amshirji Jadilar ( Jamitsür) nem Tsüngremi tesangra shisatsü sempet agütsüba, nisung rongnung kar sensaker, Kar takar, kar yim kümzüksü nokinketter, kar kenshi oshir, yamala bentet bentetta lipa lirotsü atema Süpangsü ( Tsünkotepsü) ataktsü poratetta. Iba sü ajanga Nokinketer sü, süchir sü süchir sa rongnung ano shiri Sü ka ka küm shia masü yonga terokpen chidir ( Itemi küm terok anembongertem) parnok sü nungji keyi aser molusongzü, aser mangku nok nü meinoker saka nokinketerbo ano sü-a chira parnokbo ajak inoker. Sübangsü nung sentsü asem Temeren, Tanak, Temesüng nung shiruru tetezü aketba tapu tenet lir. Temerem Azü dokshiba, Tanak aya wara. Iba ten tetezü mesüktepba JA 6 : 4-6 nung lir. Temesüng tetezü Mth 5 : 9 yimjung yanglurtem dang Tsüngrem chirtem ta ajatsü Temesüng tila ka nungji shiruru meyoktepba aika lir. Tetsü tebou mapang Limabur saka anisüng metene sadi kuli maki kibong mekümdaktsü tepori air mekaita ayuba tateshitsü ango tapu ka kecha tena memeyoktep temerük seret ka shi nungi tema aira tepo nem agütsür ajisür-a ano asanguba ten Tembo, ashipo par aseme Tsük chi ka ka sünga den asangubaipo tsük denji Nok tajung ka renemtsür aira tepoer nem anisen agüja aru. Aji oda airi asanguba nem anizük sü ka nai tiyazüma ta azüngshiba agüja aru. Yamaji alima kin ajak kibong akümtsü asoshi aniasüng makaibo kibong makümer, mesüra akümbaji Tsüngrem anema kechaser kibong akümba ya Tsüngremi Adam aser Eva nungi tenzüker. Saka oda odapo taküm Tsüngrem amaa doker bei külemnütsü tsüngrem külema tenzüker ANISÜNG meindoktetter. Cana yimdak kiyir benjong nung Yisu dener sayatenya inyakba ya tesüngmangtsüka, Long mori pongu, Mori ka nung tzü litres 80 mesüra 120 tashi aiba süra pongu nung liter kowe alitsü? Iba mapa ajanga anisüng aser kijemba sentongji Tsüngrem tesayuba mapa ta jangjatsür. 1950s tashi nung sadi sentep tembanger benjong akitang sadi daki arur nem salilepsa lemetsü, aji tim masü ta angatetter amtsüklep sa lemetsü yamaji melenshia arudang, tenüngpo meshili saka Tsüngrem tenzüker kibong kati anisüng DABA arogo office nung akiba,

aser chiyongba benjong makie sadi kuli akiba ajanga anisüng aser sadi benjong tajungba melenshia aruba angudang pelaseta liasü, yamaji tajungba aser temerükba bendenloktsü melena zübazüba penshiba agi Tsüngrem sentsü mewangshitsür. Adianu ayanu lembuba yimden aser arogoi nokdangba aitsür masü kümzüker, saka atsü apong mependange lembudaktsütsü lenmang lapoktsüti ta asüba ya alima tatempang temaitsü RARA, osang AYA wara TASHIDAK wara MENOKNOK, TZÜYIM TZÜSEM, YIPRU MOPONG, item ajak dang nungi mojing mapa tulutibaji atsü apong mependang-e kijemdaktsüba ya, lipok nungi Tsüngrem sendong nung maliba Mojingi inyaker. Anungji iba mapa dang Mojing pukümertem aser tenzükertem Tsüngremi mettsü tajung prok saka Mojingi sangremer tsük prokoktsü.

Alima tenzükdang Israel kidong ya Tsüngremer alu asütsü shimtet Mth 20 tapu ajak Tsükmenatsü lu ayimba jagi Temeranger Kibuba meyong kidong ta ajar. Saka Israel lima tanü tashi nung christain 2% tang lir ta angazüker. Saka Tsüngremi manene pushir; Aramesuang aser nai Tsüngrem tenlaki aser tenla sabangji asatangang aser idakji tekülemertem züngdang; (Pa meyong kidongji mijeta pushiba angatetter) Tenla kima tezülen kilempokjibo tokjang, ajipo kintem nem agütsüogo, aser parnok Ita lirana (Küm asem sür tesatang) temeshi yimtiji (Yirusalemji) tetsüng agi ajemshitsü idangji Ni kü kulisür ana (Mosa aser Elija) yoktsü. Parnoki anem sü abener, anogo meyi ka sür Noklang ana sür roker shin o jembitsü. (Küm 3 sür tesadang) Israel puküma sayatenya inyaktsü. JA 11: 1-6. parnok dang temeranger Kibuba meyong kidong ta ajaba jongkai adoktsü mapang anasa arur.

Tsüngrem tsüngdang asen adianu kintemjia dena lir, saka asen kin ya temeranger Kibuba meyong kidong tarensen nungji dena lir ta angatetter, saka otsü angatangra otsü jembitsü aser inyaktsü tsüpuba agi rongronger süra kangki nung koda metatsü. Ibaipo khen khen memetette aipelenba masü metet sümonga tejak ajia tepu akümba ta jangja jangja adoker. Ak zü, An zü, aser Nabong zü amshia ki, Gari, kimong, meshitetsü toyur itemi Yisu khrista anema inyakertem, joko tanem tanemi tiyazü sayutsüngir aser ainketter tali tali adoktsü. AMOS okila Linük nübur rongsen madak ochi mashi, tamang yimsü maparen ajak tema terprangtsü asoshi tang liasü aser nüburtemji kümzüka alitsü tilmajia kangabo mali asü ta zülua angutsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

### Bangladesh nung Khristantemi missionary, Lague atema mangyimer



Missionary, Gilles Gilbert Lague

Taoba mapang East Bengal ya British India kübok aliba mapang 1853 kum missionary tem iba tesemi arua liasü aser parnoki Bangladesh tesem ajaklen Arogo amenoktsüba den külemi school aser college aika lapoktsüogo.

Tang Holy Cross nungi putir, nun tem aser brothers 1,200 dak tema linük 16 nung tenzükba wadang inyakdar.

Lague ya 1939 kum November 29 nü aso aser kibong nung tanur trok rongnung pa tambusang liasü. Pa school azüingba sülen 1952 kum nungi Holy Cross Minor Seminary nung azüing aser 1965 kum putir aküm.

Pa 1966 kum taoba mapang Pakistan (tangbo Bangladesh)-i aru. Pai Bengali oshi mezüing angazükba sülen Arogo asem nung inyak.

Dhaka nung aliba Holy Spirit National Major Seminary nunga pa tesayur inyak aser kum aika Spiritual director inyaka liasü.

1997 kum pa Barishal, southern Bangladesh nung aliba Holy Cross Novitiate nung Director akümba sülen yangji kum 9 inyak.

Pai Bangladesh nung kanga meim, ibayongji pai pa tasü mang Bangladesh nung ang aremtsü mepishia liasü.

November 9 nü Holy Cross Scholasticate nung mezüingbuba asüpila sentong agi aser tanabuba asüpila sentong November 10 nü St. Mary's Cathedral nung agiba sülen Dhaka nungi kilometer 30 shi pilar Gazipur district nung aliba Holy Cross Pastoral Center nung tasü mang remtsüogo.

November 11, 2023:

Bangladesh nung kum 50 dak tema missionary inyaksang, Gilles Gilbert Lague alima nungi pilaogo; pa arrshi kum 84 liasü.

Canada nungi missionary, Lague asüba atema Bangladesh nung Khristantem aser Arogotemi mangyim tenzükogo.

Lague-i kum 50 dak tema Bangladesh nung Arogo aser loktiliba tenzükba aru. November 9, 2023 nü pa Bangladesh yimtiba, Dhaka nung aliba nija hospital ka nung asü, ta Holy Cross Congregation-i sangdong ka ajanga metetdaksü.

November 9 nü Khristantem meyirjang aika Dhaka nung aliba Holy Cross Scholasticate aser St. Mary's Cathedral nung adenshia asür nem akhüm agütsüogo.

Iba dak alia Khristan aikati social media ajanga asür nem

akhüm agütsü.

Tang Auckland, New Zealand nung alir aser Bangladesh nung Bernard Gomes-i, "Gilbert, tesü ne nung anisüingzükang. Nai Bangladesh nung Arogo yangertsü atema inyakba mapa tajungtem atema onoki pelar," ta metetdaksü.

Holy Cross nung putir, Bejoy Rebeiro-i, "Pa ya ni asoshi tanela tsütsü director ka liasü. Pa nisung tajung ka liasü aser pa ya ni lenmang shidakleni aniba lenir ka lir," ta metetdaksü.

Chattogram Arogoia Facebook post ka ajanga, "Putir Gilbert Lague, CSC-i Chattogram Arogo kübok Arogo aika nung mapang talangka menden balala nung tenzükogo. Bangladesh nung Arogo, talisa Chattogram Arogo atema tembar tajung ka samaogo," ta metetdaksü.

### 'Journey to Bethlehem' theaters nung sayaogo



November 11, 2023: November 10, 2023 nü theaters nung "Journey To Bethlehem" film sayaogo; iba film repringba ajanga Laishiba nung shia aliba ama Yisu Khrista asoba otsü asentenshir taliba rajemtsü.

Osangbener den jembidang AFFIRM Films nung tongti aser executive vice president, Rich Peluso-i, "Iba film nung otsü ashir, live-action musical den choreography aser tsüingsangba

lir. Film nung Antonio Banderas-i Herod Chuba shilem agir," ta metetdaksü.

Kasa film nung Fiona Palomo-i Mari aser Milo Manheim-i Yosef shilem agir. Iba dak alia Khristan artists-Lecrae-i kodak tenyar Gabriel shilem agir aser osangtajung kentener (apuan) Joel aser Moriah Smallbone natia shilem agir.

Peluso-i, "Mari mashisa

akümba indang osang angashidang Yosef-i koma asüar asenoki meteta dang lir, ajisüaka Yosef tetsüi koma asü? Yosef tebu-ia koma asü? Mari'er tsüraburtemi iba atemaji koma bilem?" ta ashi.

Interview ka nung jembidang film Producer Alan Powell-i, film otsü nungji Laishiba nung maliba shilem kar bendenlokoyonga Lai nung aliba ochi onoki sayuner, ta ashi.

### ANOGO ABEN TSÜNGREM DEN

#### OZÜNGI TEMEIM ATALOKDAKTSÜR

"Temeimi kiyonger dang majung meinyaker, anungji ozüngji temeimi atalokdaksür" Rom 13:10

Asenoki koda meimtsü ozüngi sayur aser aji teti asen libaliru aser lenmang ajak nung nisung ajaki kecha tebandang makai meimra ozüng tulu anaji atalokdaksür. Pauli yangi ozüng ter rongnung pezü lephsia ashir (Anitet 20:13-15,17) Asenoki asen kiyonger meimra kudasür asenoki parnok tepsettsü? Mesüra Pa nungi asenoki parnok auyatsü? Aji asünung kiyonger dang meimang ta ashiba ozüngji benshira, asenoki tanga ozüng nungjia tashi angatsü. Atangji Yisu o nung ashir, "Aser nisungtemi nenok dang kechi koda inyakdaksünür, yamaji nenoki parnok dang inyakang" (Lk 6:31)

Iba ozüng dang ya "hon ozüng" ta ajar aser angateter temeimi ozüngji atalokdaksür. Temeimji mapa lir, temeim akaba jagi pei sasa jungkai adokdaksür. Temeimi rembanga mayur saka tangar dang mapa tajung inyaker aser iba ajanga kiyongerme temeim mapa tajung inyakdaksür. Temeim ozüng ajak atalokdaksütetbaji "Kibuba ne Tsüngrem ne mulungjang ajunga agi, aser ne taküm ajunga agi aser ne mulungsentsü agi nai pa dang meimang" (Mk 12:31) aser iba bushiba ajanga temeimba takümji abensatettsü.

#### SARASADEM:

Tsüngrem nai masadangi meimba ama onoki Ne dang meimtsü yariang. Amen.

### Gaza nung Khristantem meyong ki 50 den Khristan school ka poksa

November 11, 2023: Israel nungertemi anüinglen nungi Gaza amakba mapang nung Khristantem meyong ki 50 dak tema aser Khristan school ka densema ki aika poksaogo.

Rosary Sisters School nungji kanga sensaker Khristan aser Muslim nung kibongtem nungi tanur 1,250 shi tezüingdak liasü.

Aid to the Church in Need (ACN) den jembidang school principal, Sister Nabila Saleh-i, school raksaba ajanga la melung kanga raksar, ta ashi.

Gaza nung rara tenzükba sülen school ji azüingtetja liasü, anungji school poksatsüba lendong nungji shinga masü mesüra meyiru.

Nun temi iba tesemji toktsür moui maneni teyari nüngdabapurtem yaritsü telemtetba agiogo.

Chiyungtsü agi anünyonga Holy Family Church aser Orthodox Church of St. Porphyrius nung Khristantem densema nisung aika jenokdaksür yaridar.

Arogoisa tanur 100 densema

Khristan 750 shi anepalua yaridar.

"Rara tali anasaba arudar, ajisüaka teyari agütsütsü atema rara anena matara nisungtem mainshitettsü, kechiyong nisungtem kanga tsübur. Iba dak alia chiyungtsü aser tzü agi kanga anünger. Onok aliba tesem nung dang masü saka tanga tesem nunga kasa dang," ta Khristan kati metetdaksü.

Orthodox Patriarchate of Jerusalem-i ashiba agi, rara tenzükba sülen Gaza nung mezüingbuba hopta asem tsüingda mosques aser Tenla kitem densema tekülem ki 19 shi raksago.

"Timtem mapang nung onoki Tenüingsang Ken 34:18 nung shia aliba azünger; iba Lai ajanga asenok dang, 'temelung raksar alirtem anasa Kibuba lir aser tanela nung laor alirtem kümzüker' ta nenshia metetdaksür. Onoki Gaza nung yimjung aser ochi temeden aliba den rara anentsü atema sarasademer," ta Orthodox Patriarchate-i metetdaksü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Semki**

(n) süng agi tsük asentsü yangluba oset (wooden rice pounding block)

\* Akhidangbo semki nung teka agi tsük sena chiyonga aru.

**Semkilong**

(n) semki nung tsük enokba tapok ( hole in rice pounding block)

\* Semki ka nung semkilong ana asem apar.

**OLONG PAITEP # 6613**

Grid for OLONG PAITEP # 6613 with numbers 1-17 in various positions.

**TIPIEN**

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

**OLONG PAITEP # 6612 TELANGZÜBA**

**TIPIEN :**

- 1. Matara 7. Met 9. Atemokba
10. Teloki 11. Let 12. Esau
13. Tokora 16. Rom 19. Agia
20. Among 22. Okrong 24. Zunga
25. Koma 27. Kao 28. Makar

**LANGTSÜNGLEN :**

- 1. Matet 2. Ate 3. Telok 4. Amo
5. Roker 6. Akisa 7. Malur 8. Tatem
14. Ongzük 15. Omaogo
17. Oangma 18. Amoka 20 Ar
21. Onok 23. Ka 26. Ar



**ALOKBA O WARAKLA NA KIBONG KÜMER KÜM-50 AJUNGBA JUBILEE-MONG AMUNGTSÜ ATEMA MANGATETTEP ADOK :**

Warakla : Hai Kinungbu...Ana küm-5 dak tali jangradema lia aruogo, saka ana opang mapu melitetsüsa akümerji, ana balaa-dokdi, jokorla ni-ang ki tanga ka yanglur yangji oa alitsü odi... Na dang junga liang.
Alokba : Hai-to...koda asütsü... Nai melinüi ayazüka aorji ojang adi...Na-a junga dang liang. Alokba o Warakla na melitetyongjia, tena sadir küm-50 ajungba jubilee amungtsü pei pei sentong yanglu.... Saka Waraklabo ki balaka mesema aliba agi kümsük agi küm-50 mabensa-a...ta ken o ka adoker... Iba ken o-ji angatetteptsü atema kinunger anük-apang ajak jatapa angadandaktsü.
Kinunger : Hoi... Alokba o Warakla na jubilee amungtsüba ken o nung mangatettepi aliba nungji... kinunger/ anükapangtem-ia pei pei tangatetba shidangangjong... ???
Anukla : Ena...Kü tangatetba-bo... Tena Sadibaji tang Alokba telidak kidang sadi... Warakla ki toktsür orr ki tasen mesema aliyongjia, Sadiba-jibo mezüng tena aliba kidangji sadi... Anungji jubilee amungtsü Warakla-a temeden lir ta nibo angateter... Asenoki sadiba küm aser ki tasen mesemba küm...iba anaji meyoaktepa mangatetsüla.
Okola : Ohoi... Kecha aika jembitsü mali... Iba nungji dang ken oji tembanga yudi... Jubilee amungtsübaji Alokba o Warakla na prongla temeden lir...ta tanü lemteta yutsür.

~ Lilir- L.Kika Pongener.

**Assam Congress lennir 2 den TMC lennir ka BJP nung aden**

Guwahati, November 11, 2023 (Agencies): Sangküm Lok Sabha election agitsü aliba jakdang Assam BJP unit jenjang tajungba yanglushiogo aser ibaji Congress lennir anati BJP nung adenba lir.
Congress lennir tejen aser Nagaon district Congress unit president Suresh Borah-i tanü BJP nung aden. Pa den külemi Assam Youth Congress working president Poritush Roy-ia BJP nungd denogo.
Congress lennir ana dak alia Trinamool Congress lennir Dilip Kumar Sharma-ia BJP nung aden.
Tanü BJP state headquarters sentong ka nung Congress lennir aikati BJP nung aden.
Iba sentong nung Assam BJP president Bhabesh Kalita aser minister Pijush Hazarika o minister Ranoj Pegu na aden.
Congress lennir aser party züngsem aikati BJP nung dennür aser iba ajanga Congress tashimait akümsü ta Assam BJP president Bhabesh Kalita-ashi.
"Congress party lennirtemi onok den tongtepar. MP aser MLA temi onok den dennür. Tangbo parnok ajak onoki magizükteter" ta Kalita-isa ashi.
Item lennirtemi toktsüba ya party asoshi khen takoksa lir ta

Assam Pradesh Congress Committee (APCC) president Bhupen Borah-ashi.
"Kodang nisung kati party toktsüdir party-i takoksa khen ajurur. Saka Congress party putiotsü talang nungnisungtemi party toktsüba ya tang tasen masü. Item tayongzükbatem liaka Congress party-i nübortem asoshi maneni inyaker" ta Borah-isa ashi.
Ghonda 48 tsüngda Congress party Nagaon unit president tasen ka shimtsü ta APCC president-isa metetdaksü.
"Ni ozü working president Rana Goswami dang Nagaon district Congress unit nung lennirtem aser züngsemtem den jembiteper ghonda 48 tsüngda president tasen ka shimtsü shiogo. Onoki Nagaon nung rally tulu ana ayonga agitsü. Ka Nagaon Sadar menden aser ka Samaguri menden nung agitsü" ta Borah-isa ashi.
Suresh Borah-i November 10 nü Congress party toktsü aser iba sülen tanep pai Chief Minister Himanta Biswa Sarma den ajuruteper.
Borah ya Barhampur Assembly Constituency nungi lennir ka lir aser pai Bhupen Bora dangi Congress toktsüba shidi ka zülü.
2021 assembly elections

nung Barhampur constituency nungi Borah-i votes 751 agi dang BJP candidate Jitu Goswami den tamakok ngua liasü.
Poritush Roy-i November 11 nü Congress party nungi anenba shidi agütsü. Pai züluba shidi nung 'family centric politics' indang kuli ajanga pai party toktsüba shia lir.
Taruba Lok Sabha elections nung BJP-i menden 12 nung takok angutsü ta Bharatiya Janata Party (BJP) Assam state president Bhabesh Kalita-ashi.
Suresh Bora ya Congress lennir tejen ka lir aser pai küm aika Congress tenzüka arur temelenshi atema BJP nung aden. Pa adenba ajanga BJP tamendakdak akangshitsü, ta pai ashi.
2024 Lok Sabha election nung BJP-i Barhampur MLA Jitu Goswami toktepdaktsütsü akok. Jitu Goswami-i takok ngura Assam CM Himanta Biswa Sarma-i Barhampur Assembly menden atema Suresh Bora toktepdaktsütsü akok ta osang angazüker.
Himanta Biswa Sarma-i 2015 nung Congress toktsür BJP nung adenba sülen Suresh Bora-i pa den tesentaktep tajung nung dang lia aru ta osang ajangasa ashi.

**Manipur nung tang mezüng atema Amur falcon census agi**

Imphal, November 11, 2023 (Agencies): Manipur kübok Tamenglong district nung tang mezüng atema Amur falcon census agiogo.
Zeliangrong-Naga nunger teimba ser aliba district headquarters nung tesüiba dang nungi taküm Amur Falcon tajemba arua lir ta osang angazüker.
Wildlife Explorer Manipur (WEM) mongintem den Rainforest Club Tamenglong (RCT) volunteers aser state forest department personnel ajanga Amur Falcon anenzükba tesem asem nung census agia liasü.
Barak ayongküm anasa Chuilon arem nung parnok

anepdang nungi anüngdang tashi census mapa inyak.
Iba mapang parnoki Drones, Global Positioning System (GPS) devices aser telephoto cameras amshia liasü.
Amur Falcon anenzükba tesem asem nungi electronic gadgets ajanga bendenba osang ajak repringdangba sülen ang ozü kwi lir metettsü ta WEM-i ashi.
"Tamenglong district nung internet service majungba ajanga tabulation mapa meinyaktet" ta WEM secretary Elangbam Premjit Singh-i ashi.
Amur Falcon census agiba sentong ya Tamenglong Divisional Forest Officer (DFO) Amandeep ajanga

apiteta inyak.
"Census mapa inyakba ajanga asenoki ozü indang osang tali tejangjaba metettsü aser ozütem wazüka ayuba mapa tajungba inyaktettsü" ta Amandeep-i ashi.
Iba mapa metenzükdang WEM experts-i RCT volunteers aser Tamenlong district headquarters nung village volunteers asoshi short-term training course ka agi.
Manipur nung Amur falcons ya October ita tom ka nung Tamenglong aser kidanger state Nagaland nung anenzükba.
Ozütem ita ka shi anenzükba sülen Africa kübok Southern aser Eastern tsütsü apusoa aoer.

**Myanmar nunger 5 ket nung Rs 19 crore jenjang heroin apu**



Aizawl, November 11, 2023 (Agencies): Assam Rifles sepaitemi Mizoram nung Rs 1.21 crore jenjang Heroin seret 2.61 puogo.
November 10 nü Zote, Champhai aser Iron Br, Zokhawthar nung AR sepaitemi mita aodang Myanmar nunger

5 apu.
Osang tejangja ka angazükba sülen Assam Rifles aser Police Department, Champhai külem telok kati iba mapa inyaka liasü.
Parnok ket nungi apuba sen aser heroin Rs 19,52,08,350 tashi Police Dept, Champhai ket

nung agütsüogo.
November 3, 2023 nü Champhai district nunga Rs 2.06 crore alangba heroin grams 295.28 apu.
Assam Rifles aser Excise and Narcotics Department ketdangsürtemi Myanmar nunger ka ket nungi heroin apu.

# Macron-i Israel dang civilian tem metepsettsü mepeshi



**Paris, Yimpoksüi/November 11 (Agencies):** Israel-i Gaza nung bomb pokloktsüba aser civilian tem tepsetba anentsüla, ta France tir Emmanuel Macron-i Britishi media dang ashi.

BBC den interview ka nung jembiba mapang Macron-i, Gaza nung bomb pokloktsüba ya tim masü, ta ashiba den ceasefire ka benokba ajanga Israel ajangzüksü, ta shisem.

"Item kinü tanurtem, item tetsürtem, item tambur tantsürtem dak bomb poklokja tepseter. Anungji parnok tepsettsü atema kecha kuli mali. Anungji onoki Israel dang iba ya anentsü mepeshir" ta pai ashi.

Macron-isa, France-i Hamas pur kiralongrar inyakym ya aitsür aser Israel-ia parnok temeden kümzüka ayutsü asoshi inyaksangshiba ya agizükaka "onoki parnok dang gaza nung bomb pokloktsüba anentsü mepeshir," ta ashi.

United States aser Britain densema tanga lenirtemia pai ceasefire asoshi ayongzükba nung dendaktsüner medemdaktsüner ta

asüngdangba mapang pai, parnokia ceasefire asoshi haihaura akatsü imlar, ta France tir-i ashi.

Washington-ibo ceasefire benoktsü asoshi memulunger, ajisüaka humanitarian teyari balala agütsütsü atema rara khen anena atatsü asoshi ayongzükogo.

Hamas puri October 7 nü ajungbena Israel maka nisung 1,200 tepset ta Israel nung ketdangsürtemi shiogo. Israel-i Gaza nung bomb pokloktsüba aser iba tesem ali ajanga amak tenzüka sülen Palestine nung 11,000 dak tema tepsetogo, kong tetsü aser tanurtem timba densema lir, ta health ketdangsürtemi metetdaksü.

Alima kin temi Israel dang azüzüka inyaksü ayongzükba arudar, ajisüaka parnoki ashiba agi, ceasefire benokra Hamas puri iba maongka agia parnok jenjang yanglushitsü ta shia arudar.

Macron-i intrview nung lemsatepba indang telangzüba agütsüba mapang Israel Ato Kilonser Benjamin Netanyahu-

i ashiba agi, alima lenirtemi Israel masü saka Hamas pur aitsütsü nüngdaker.

"Hamas puri tang Gaza nung ozüing alema inyaksangshia aliba ya asüngbo Paris, New York aser alima kübok tesem mashi ka nung inyaksü," ta Netanyahu-i ashi.

Gaza dak sendakba nung humanitarian conference ka Paris nung amenba sülen anogo ka lir BBC den Macron interview agiba ya sayua liasü.

Macron-i ashiba agi, summit nung shilem agiba sorkar aser lokti tenet ajaki humanitarian teyari agütsütsü asoshi rara khen anena atatsü aser iba sülen ceasefire benoka kiralongrar dak sendaka maliba civilian tem taküm kümzüka ayutsüba dak alaker tanga lenmang kecha mali ta tembanga jembioigo.

"Tanü civilian tem dak bomb pokloktsür. Item kinü tanurtem, item tetsürtem, item tambur tantsürtem dak bomb poklokja tepseter. Parnok tepsettsü atema kecha kuli mali. Anungji onoki Israel dang anentsü mepeshir," ta pai ashi.

United Nations aser international rights groups temi Gaza Strip nung humanitarian tensa kanga mejungi akümtsü ta tekümdangtsü metetdaksüogo aser UN-i ashiba agi, tanur million ka taküm lendong tulu nung lir.

Rara tenzüka sülen France-i pro-Palestinian rally tem nokdanga arudar aser Gaza nung civilian tem tepsetba anema yimtung nung longkak aiterem aziöka arudar.

# MOLUNGNEN O



Asür **Nungsangkaba** (Chuchuyimlang) akümüli wadang tembanger iba lima toktsür aoba mapang kija, lokti, Arogo, tembar, kinunger, kiyonger aser temeimertem shirnokisa onok nübu, shisatsü, rongsen aser sarasadem agi nongita yariogo nenok ajak dang ozü kinungertemi kanga pelaba lemsateper. Tulusang Tsüngremi nenok ajak molamoshia moajang ta onok sarasadem.

- Temeim kinungertem

# Pak ketdangsürtemi TTP, LeJ kiralongrar 5 apu

**Islamabad, Yimpoksüi/November 11 (Agencies):** Pakistan nung counter-terrorism ketdangsürtemi Honibarnü ashiba agi, parnoki tenokdangba agütsür aliba kiralongrar telok ana nungi züngsem pongu pua Punjab province nung tongtibang tesemtem amaktsü sentong yanglua aliba raksatsüogo.

Punjab police Counter Terrorism Department (CTD)-i ashiba agi, parnoki iba hopta province kübok districts balala nung itangiter osang dak ajemdaker meita aoba sentong 179 agia liasü aser iba mapang kiralongrar pongu puogo.

CTD-isa, Tehreek-e-Taliban (TTP) aser Lashkar-e-Jhangvi (LeJ) kiralongrar telok den sendaka aliba nisungtem apuba

ajanga parnok sentong raksatsüogo, kechiyong parnok yagi province kübok tongtibang tesemtem amaktsü asoshi sentong yanglua liasü, ta ashi.

"Itangiter osang dak ajemdaker Sahiwal, Pakpattan, Bahawalpur aser Rawalpindi nung tesem kar meita aoba mapang kiralongrartem ya pua liasü," ta CTD-i ashi.

Kiralongrartem ket nungi explosives seret tesadang ka, hand grenade ana, IED bomb 2, detonator 5, safety fuse wire süklep 13, prima cards süklep 3.5 aser tashishitsü aketba kuli kakettem nguteta liasü.

Police-i item kiralongrartem anema ken o benokogo aser parnok dang ken o ashishitsü atema mejangjaba tesem kati anirogo.

# Ita ka ana sülen tang mezüngbuba Kyiv makogo



**Kyiv, Yimpoksüi/November 11 (Agencies):** Ita ishika sülen Ukraine yimtiba Kyiv tang mezüngbuba makogo, ta yimti Mayor-i ashi.

"Linük yimtiba left bank nung bomb tesashi apokba angashiogo," ta Kyiv Mayor Vitali Klitschko-i Honibarnü Telegram messaging app ajanga ashi. Bomb ya yimti kübok Dnipro ayong tabelen tzükümlen poka liasü.

"Missile khaloktsüba nokdangtsü atema air defence inyaksangshia liasü," ta paisa shisem.

Tang tashi nungbo nisung asüba osang kecha mali.

Honibarnü anepdang Kyiv teyongtsü nung bomb tesashi ana apokba angashiogo aser anüing nunga missile yima aoba mokoziü nguogo, ta AFP news agency sangdong ka ajanga metetdaksü.

Bomb mapok tsüngda mapang tatsüka dang lia Kyiv

nung kümdangshia alitsü atema osang agütsü aser yimti ketdangsürtemi yimti nung alirtem dang tekümdudak tesem balala bushia aotsü mepeshia liasü.

September 21 nü sülen tang mezüngbuba Kyiv makogo. September 21 nü ya Ukrainian air defences-i linük yimtiba kolak nung missile ka khadanga liasü. Missile ajaras aluba ajanga tanur ka densema nisung tenet tashi yirua liasü.

Ukraine tir Volodymyr Zelenskyy-i iba hopta tetenzüklen ashiba agi, asükwa arur asünung Russia nungertemi ano energy facilities tem amaktsü akok ta bilema Ukraine-i Western air defence systems tem amenoktsüogo.

Russia-i taoba küm Ukraine indang energy grid amak aser iba ajanga kanga asükba mapang nüburtem aika electricity makai asükwa süidaktsüogo.

## SHORT FILM COMPETITION

- 🌟 The Department of Information & Public Relations invites entries for Short Film competition.
- 🌟 Films should be **5-7 minutes**.
- 🌟 Selected entries will be awarded with **attractive cash prizes** and will be screened during the **4<sup>th</sup> Nagaland Film Festival 2023**.

For more details, log on to

[www.ipr.nagaland.gov.in](http://www.ipr.nagaland.gov.in)

Send a mail to

[iprnagaland@gmail.com](mailto:iprnagaland@gmail.com)

Call us: **+91 88611 60084**

### 45buba Nagaland State Masters Open Badminton Championship tembangogo



**Didmapur, Yimpoksüi/ November 11 (TYO):** 45buba Li-Ning Nagaland State Masters Open Badminton Championship November 11 nü kanga takok ngua tembangogo. Iba asayamung ya Dimapur Badminton club indoor stadium nung asaya liasü.

Iba asayamung nung district 11 aser Nagaland police densema ajak senteper team 118-i shilem agiogo. Asayamung ya Dimapur District Badminton Association-i ayongzüka teburtem atema category balala trok kuma lemsar yaogo.

Asayamung shibangba sentong nung Advisor to CM Abu Metha alaktet ajaoker liasü. Sentong nung o jembiba mapang pai, nüburtem nem takokba tashi teyari agütsütsü aser lenla balala nung nüburtem ajungtettsü asoshi sorkari takokba tashi tajungtiba inyaktü merangtsü tenangzüka agüja liasü.

Paisa, state nung badminton asaya renloka aotsü asoshi lenmang sadema lapoka lir ta ashiba den asaya ajak rongnung badminton asaya ya tali nongita arudar, ta shisem.

Maneni paisa, Nagaland nung

ajak dang tongtibangtiba nisungtem aikati badminton loktitetet tir mapa benogo, ta ashi.

Nagaland nung tang tejangraba tulu lir aser otsü tasen ka zülutsü nungdaker ta shia pai lanurtem dang iba mangdang ya tejakdangi bener aotsü ajungshia liasü.

Metha-isa, Nagaland ya mapa tamajung agi masü saka tajung agi metetdaksütsü mapang tongogo, ta shia international jenjang tashi nung takok tajung nguyonga aotsü meranga inyakteptsü ajungshi.

Nagaland-i, music, art entertainment aser saisapong nung linük yangerba nung shilem tajung agiogo ta shi, pai ajak aser talisa saisapong nung ajak longjemer ka ama inyaktü ayongzüka liasü.

Kasa mapang nung NBA Hon Jubilee amungba nungdem nung alakteta jaokeri jubilee coffee table book sayaja liasü.

Sentong nungsa Nagaland Badminton Association tir Kesonyu Yhome-i tir o jembiba aser mezüngbuba NIS Badminton coach Atu Pongener-i, state nung badminton asaya koda renlokyonga ao iba indang otsü

tatsüka lemsatepa liasü.

#### Asayamung nung takok angurtem:

##### MD 55

- 1 Saku Jamir+Alem Pongener
- 2 Dr. Athikho+ Khanngaining

##### MS 55

- 1 Yekhuvi Achumi
- 2 Alem Pongener

##### MD 50

- 1 Bendangnochet+Angam Saiza
- 2 Dr. George+ Saku Jamir

##### MD 45

- 1. K. Pikuto+Kavito
- 2. Dr. Wati+Kuhozhe

##### MS 45

- 1 Tajenkaba Ao
- 2 Haidingsap Zeliang

##### MD 40

- 1. K. Pikuto+Kavito
- 2. Er. Y. Akito Sema+Hekato Swu

##### MS 40

- 1. Meyiakum Jamir
- 2. Hekato Swu

##### MD 35

- 1 Tongpangmeren Imsong + Imliwapang Tzudir
- 2 Along Jamir + Pusutemjen Longkumer

##### MS 35

- 1. Imnatoshi Longkumer
- 2. Joshua Keppen.

### Oliver Kahn-i India nung pa indang Football Academy amenokogo

**Yimpoksüi/November 11, 2023 (TYO):** Taoba mapang Germany nung nungtugu goalkeeper Oliver Kahn-i India nung pa indang academy amenokogo. Iba academy ya India nung football education jenjang melenshitsütsü aser asaya renloka odaktsütsü nükjidong nung amenokogo.

Pai Maharashtra nung Pro 10 den longjemer iba academy amenokogo.

Oliver Kahn Academy ya, lenla ajak nung football education agütsüba tesem ka akümtsü nükjidong nung amenokogo, kong asyartem anitettsü asoshi rangloker inyaksangshitsü.

Maneni parnoki linük kübok tesem balala nung football clubs, sports academies aser educational institutions tem den longjemer academy tem amenoktsü sentong lir.

Parnoki ano linük kübok tesem balala nung goalkeeper academies tem amenoktsü.

Khan-i, linük nung ano mejangjaba sempet aketba



Oliver Kahn

asyartem aika lir ta amanger.

"Football asaya nung tejakdangi aotsü asoshi linük ka ama India dak tashi lir. India nung iba asaya renloka aotsü atema football education shitak, disciplined curriculum ka aser world-class facilities tem nungdaker," ta pai ashi.

"Onok nükjidongji India ya tang dang nungi football tajungba asayaba linük ka kümdaktsütsü asoshi lir aser

international jenjang nung takok tajung nguteta asayayonga aotsü atema linük dak tashi lir ta ni amanger," ta paisa shisem.

Mongolbarnü All India Football Federation (AIFF) tir Kalyan Chaubey-i, Khan India tonga aruba mapang pa pelashishia agizükogo.

"Mr. @OliverKahn India-i pelashishia agizütsü maangka nguogo," ta Chaubey-i X sabang nung zülutsü.

"India nung football asaya dak sendakba nung informal sensaksem ka agiba mapang onoki terenlok asoshi onük balala benoka sensaksemogo, kong Goalkeeping Academy ka amenoktsüba densema liasü," ta paisa shisem.

Khan tatemsa 2008 küm India semdanga liasü. Iba mapang pa Bayern Munich nungi asaya liasü aser pa iba club nungi tatembangbuba asaya Mohun Bagan den Salt Lake Stadium, Kolkata nung asaya, koba parnoki goal 3-0 agi koka liasü.

### Dhiraj-i continental qualifiers nung silver angu

**Yimpoksüi/November 11, 2023 (Agencies):** Honibarnü Asian Continental Qualification Tournament nung silver medal ka anguba sülen Dhiraj Bommadevara-i, India asoshi archery nung Paris Olympics quota mezüngbuba ngutetogo.

Külem India nung asayar Tarundeep Rai last-eight nung tsükatokba sülen India nung rongnungi pa kija dang aküm aser arishi küm 22 tain asayar yagi set ana indang indanga koka final-i ia liasü.

Asian CQT ajanga, tebur aser tetsür section nung final-i aiba linük ana nem individual quotas agütsür.

Ajisüka asaya nung Dhiraj-i gold medal monguteti liasü. Pa Chinese Taipei nung asyar Zih-Siang Lin 5-6 (29-28, 27-29,

28-28, 30-28, 25-26) (9-10) agi mekoki liasü.

Dhiraj-i mezüng quarterfinal nung Iran nung asayar Sadegh Ashrafi Bavili 6-0 (28-27, 28-25, 28-27) agi akok aser iba sülen semi-final nunga pai Iran nungersa Mohammadhossein Golshani 6-0 (30-27, 29-25, 29-27) agi koka liasü.

India tsürtem rongnungi Ankita Bhakat quarterfinal nung Uzbekistan tsür Ziyodakhon Abdusattorova-i tsükdaktsüba sülen individual section nung India tsürtemi quota monguteti liasü.

Tata Academy nungi adokba archer ya mezüngbo 3-1 agi tejakdang liasü saka asaya aoba sülen lai 4-6 (29-23, 27-27, 24-25, 27-27, 24-26) agi asaya mekoki liasü.

### Senior Women's Inter Zonal T-20 Trophy Nov 24 nungi asayatsü



SENIOR WOMEN'S INTER-ZONAL T20 TROPHY 2023

**Dimapur, Yimpoksüi/ November 11 (TYO):** Senior Women's Inter Zonal T-20 Trophy Lucknow nung November 24 nungi December 4 tashi asayatsü.

Hon.Secy Nagaland Cricket Association aser NE Zone Convenor Hyunilo Anilo Khing-i sangdong ka ajanga ashiba agi, iba asayamung nung Nagaland nungi senior tetsür asayar 4 North East Zone team nung züngoksema lir. Limatola Ao leniüba nung NE Zone team asayatsü aser la den Sentilemla Imsong, Sariba Khan aser Jyoti Thapa nungera team nung züngoksema lir. Maneni team Physio ama Wangshila Jamir-a Womens NE Zone team tem iba asayamung asoshi aotsü.

North East Zone nung, Sikkim CA, Nagaland CA, Arunachal CA, Meghalaya CA, Manipur CA aser CA Mizoram ta North East States Cricket Associations 6 densema lir.

Sr. Women's Inter Zonal T-20 trophy ya league cum Knockout basis nung asayatsü, kong 1. North Zone, 2 South Zone, 3. East Zone, 4. West Zone, 5. Central Zone aser 6. North East Zone ta Zone 6 India indang Premier domestic title atema tokteptsü

Sr. Women's Inter Zonal T-20 trophy atema NE Zone team nungi asyartem:

- 1 Nabam Yapu, Arunachal Pradesh
- 2 Haorongbam Kiran Bala Chanu, Manipur
- 3 Rajkumari Linthoingambi Devi, Manipur
- 4 Keisham Kalpana Devi, Manipur
- 5 Riticia Nongbet, Meghalaya
- 6 Luiza Tamang, Meghalaya
- 7 Debasmita Dutta (Vice captain), Mehalaya
- 8 Lalrinmawii, Mizoram
- 9 P.C. Vangsangzuali, Mizoram
- 10 Limatula Ao (captain), Nagaland
- 11 Sentimenla Imsong, Nagaland
- 12 Jyoti Thapa, Nagaland
- 13 Ssriba Khan, Nagaland
- 14 Purnimaya Gurung, Sikkim
- 15 Primula Chettri, Sikkim

#### Stand by:

- 1. Kojjam Ranjita, Manipur
- 2. Ajima Sangma, Meghalaya
- 3. Vanlalremtluangi, Mizoram
- 4. Alemienla, Nagaland
- 5. Tshering Ongmu Lepcha, Sikkim

#### Support staff:

- 1 Baiahun Myllemngap, Manager, Meghalaya
- 2 Sonam Palden Bhutia, Head coach, Sikkim
- 3 Kikam Bhutia, Coach, Sikkim
- 4 Wangshila Jamir, Physio, Nagaland
- 5 Jasika karam, S&C Coach, Manipur
- 6 (BCCI to depute), Performance analyst.

### BILEMDANGANG

"Tamajung nungbo tangar dang nungi balaka asütsü temerang."